

Duc adum per defener noscia autonomia

Doman a Trent la manifestazion per sostegnir e revitalisèr l'autonomia del Trentin

L'é tempes senestres per l'autonomia, che vegn metuda en discusion, neèda o strantenuda; chi che no l'à, i ge fèsc la vera, chi che l'à, de spes no i cognosc ne enten sia rejons e segnificac.

Per chierir de renovèr la partezipazion politica e soscedèr la consaputa di trentins sul gran valor de l'autonomia aldilà de ogni partegnuda, n grop nasciù dal bas, su imput anter i etres del storich Lorenzo Baratter, à endrezà na manifestazion en sabeda ai 10 de mèrz a Trent.

"Volassane che la jent tole pèrt a la discusion su la costions de l'autonomia – disc i promotores – e la se mete en jech en pruma persona per la defener e per la renovèr e ge dèr n significat atuèl. La manifestazion l'é na gran ocajon per ge dèr nef svunga a na autonomia che cognessa aer desche fondamenc l'unità e condivijion de la comunanza, la sobrietà tel durèr i scioldi publiches e la responsabilità personèla, senza spetèr la soluzion di problemes da "mama" Provincia.

Te chisc tempes de crisa noscia autonomia vegn tachèda amò de più, da goernadores de la provinzies vejines e da na opinion publica nazonèla che reiona de privileges a na vida demagogica, senza cognoscer la storia e ne la leges fondamentèles del Stat.

Podon averjer la discusion – disc amò i promotores – e tor dant

la critiches sui cosé de la politica o su "l'invadenza" del public tel privat, domanan n bon goern e na gestion ascorta de la competenzes che noscia autonomia à abù dal Stat, ma ampò no podon lascèr che i mete en discusion noscia autonomia, n derit vadagnà tel temp da noscia comunanzes."

"Noscia mans per crescer ensema" l'é un di slogan cernui per la manifestazion, aldò de l'idea che l'autonomia del Trentin l'é n model che ence tel rest de la Tèlia l pel vegnir tout sù desche ejempie, enzeze che ge fèr la vera. Chesta manifestazion vel esser donca na reazion forta e chièra de duc i trentins, ence de schieramenc politiches o de sensibilità desferentes, moec demò da la voa de defener e valorisèr ches gran patrimonie. Tel cors de la manifestazion vegnarà deschiari travers na lingia de cure intervenc l segnificat e l valor de l'autonomia, n conzet leà a la formes più autes de democrazia, che à desche fondamenc la partezipazion e l prinzip de sussidiarietà. Anter i intervenc pervedui sarà ence chel de la storica da Moena d.ra Maria Piccolin, che rejonarà a inom de ladins, mochegn e zimbres, del raport anter autonomia e mendranzes, recordan la longia storia de noscia valèdes, che travers la Regoles à semper sapù se rejer con na gran autonomia.

Max Sommariva l'é l pont de referiment te Fascia per chesta manifestazion populèra, olache duc é envié de cher a tor pèrt. L'apuntament l'é per doman, ai 10 de mèrz, da les 14.00 te Piazza Cesare Battisti a Trent: na piazza che per l'ocajion sarà n gran spazie avert olache se podarà pissèr, scutèr e rejonèr del davegnir de noscia autonomia, speran che ches sie demò n prum vèrech per envièr via n projet avert con la partezipazion de duc. (lg)



La storica da Moena Maria Piccolin portarà la ousc de la mendranzes del Trentin doman a la manifestazion su l'autonomia.